



*La Naissance du Sauueur Iesus-Christ en Bethlehem, ainsi qu'il estoit prophetisé.*

**V** temps que Cesar Auguste tenoit l'Empire Romain, & que la paix estoit par toute la terre, fut fait vn Edict, que tout le monde fust enrollé, chacun en sa ville. Pour à quoy satisfaire, tous alloient chacun en sa ville; Ioseph aussi comme les autres, avec Marie son espouse, monta de Galilée en Nazareth, pource qu'il estoit de la maison & parenté de David, & se retirerent en Bethlehem, non à autre intention que pour obeir à l'Edict d'Auguste. Par ce moyen on void clairement, qu'ils furent conduits comme par la main de Dieu, au lieu où il falloit que Iesus-Christ nasquit, ainsi qu'il estoit prédit par le Prophete Michée. Tous les logis estoient ja occupez, à cause dequoy ils furent contrains de se retirer en vne estable, où Marie enfanta son fils I E S V S, & apres l'auoir enuelopé de bandelettes, le coucha en vne creiche; car il n'y auoit point de lieu pour eux en l'hostellerie. Par là peut-on voir la pauureté de Ioseph & de Marie, avec la rigueur de l'Edict du Prince, en ce qu'on n'excusoit personne, & que Ioseph fut contrain de mener sa femme en ce temps si fascheux, elle qui estoit prest de accoucher, ne pouuant autrement faire pour obeir à l'Edict. Or combien que Iesus fut nay en vn lieu si abiect, cela n'a empesché ny les Pasteurs, ny les Roys, de le venir adorer.